

## *Viadi dils ministrants dalla Lumnezia*

Avon las vacanzas d'atun havein nus survegniu ina brev da sur Peter e sur Dirk per ir sin viadi da ministrants. 16 ministrants e ministrantas dalla Lumnezia ein s'annunziai per quei viadi tier la fiasta da ministrants dil Grischun e nos dus plevons sur Dirk e sur Peter sco era Yvonne Bundi la secretaria dalla pleiv han accumpignau nus.

Sonda, ils 21 d'october 2023 eis ei lu stau aschi lunsch. La schliatt'aura ha denton buca lavagau nossa buna luna e per cletg ha ei era buca pluviu trasora.

Il transport tochen Glion era organisau cun autos privats e suenter essan nus ir cun tren dalla Viafier retica tochen giu Cuera.

A pei essan nus ir encunter il marcau vegl da Cuera. Leu havein mirau la baselgia da sogn Martin (reformada).

Arrivai el seminari da sogn Gliezi che schai marcantamein sur il marcau da Cuera han ins fatg beinvegni als ministrants e dau las infos per il gi.

Igl emprem havein nus fatg in giug d'emprender d'enconuscher in l'auter. En tut eis ei stau entuorn 130 ministrants e ministrantas dil Grischun. Da quels 130 ministrants eran ualti biars dalla Surselva e dapertut han ins udiu nies bi lungatg Romontsch.

Suenter ha il City Game entschiet: En gruppas havein fatg differents posts a Cuera. Tier in post vein nus p.ex. fatg in pign teater tenor cavazzins che nus vevan survegniu. Era la Catedrala era in post aschia che nus vein empriu d'enconuscher empau la baselgia principala da nies uestgiu da Cuera.

Sil plaz Arcas che schai el marcau vegl vein nus encuretg detagls vid casas tenor fotografias che nus vevan survegniu. Gnanc schi sempel ! Tier mintga post han ins survegniu infos co in misterius *Mister X* vesi ora che nus vessan dad anflar pli tard.

Lu vein nus tuts giu fom e vein survegniu ella sala da magliar dil seminari da students in bien Hamburger cun salata.

Era nies uestg Joseph Maria Bonnemain era presents tiel gentar.

Suenter gentar essan nus ir a trenar da cantar. Erik e Fabio dus dils organisateurs han fatg cun nus l'empreva da cant. Nus havein trenau las canzuns per la messa dil suentermiezdi.

Vinavon eis ei lu iu cun il City Game en ils differents posts. Encunter la fin essan nus ir tuts ensemen ad encurir e pigliar il misterius mister X che nus havein catta el marcau vegl da Cuera e lu pigliau el e menau sil plaz avon la Catedrala.

Suenter essan nus ir tuts ella Catedrala per festivar la messa cun nies uestg. Nus havein cantau las canzuns che nus vevan exercitau. Igl uestg ha extra fatg in priedi per ils ministrants e las ministrantas.

Sco finiziun da quei bi di havein nus survegniu petta ed enzatgei da beiber el casti digl uestg e vein aunc fatg fotos cun nies uestg.

Lu vev'ei num da prender cumiau da Cuera e nus essan ir sil tren.

El tren essan nus stai ensemen cun autras gruppas da ministrants dalla Surselva ch'ei era stai tier la fiasta e vein giu legher.

Arrivai a Glion essan nus puspei turnai en nos vitgs.

Il ei stau in interessant e cool gi.

Ministrantas e ministrants dalla 5. e 6. classa e sur Dirk